

2148

Bosna i Hercegovina
Federacija Bosne i Hercegovine
SKUPŠTINA KANTONA SARAJEVO



Босна и Херцеговина
Федерација Босне и Херцеговине
СКУПШТИНА КАНТОНА САРАЈЕВО

Bosnia and Herzegovina
Federation of Bosnia and Herzegovina
CANTON SARAJEVO ASSEMBLY

**Komisija za obilježavanje, čuvanje i
njegovanje historijskih događaja i ličnosti**

Broj: 01-05-31047-10/19
Sarajevo, 29.08.2019. godine

SKUPŠTINA KANTONA SARAJEVO
n/r Predsjedavajućeg

SLUŽBA ZA SKUPŠTINSKE POSLOVE
n/r Sekretara

PREDMET : Nacrt Odluke o obilježavanju javnih površina, institucija i ustanova imenima i zgrada brojevima na području Kantona Sarajevo – dostavlja se

Komisija za obilježavanje, čuvanje i njegovanje historijskih događaja i ličnosti Skupštine Kantona Sarajevo sačinila je Nacrt Odluke o obilježavanju javnih površina, institucija i ustanova imenima i zgrada brojevima na području Kantona Sarajevo koju Vam u prilogu dostavljamo.


Predlaže se Skupštini Kantona Sarajevo da nakon razmatranja Nacrta Odluke istu stavi na javni uvid i raspravu u trajanju od 30 dana.

S poštovanjem,



PREDSJEDAVAJUĆI KOMISIJE

Damir Nikšić



web: <http://skupstina.ks.gov.ba>
e-mail: skupstina@skupstina.ks.gov.ba
Tel: + 387 (0) 33 562-055,
Fax: + 387 (0) 33 562-210
Sarajevo, Reisa Džemaludina Čauševića 1



Na osnovu člana 140. Poslovnika Skupštine Kantona Sarajevo ("Službene novine Kantona Sarajevo", broj 41/12-Drugi prečišćen tekst, 15/13, 47/13, 47/15 i 48/16), Skupština Kantona Sarajevo, na sjednici održanoj dana _____ godine, donijela je slijedeći

ZAKLJUČAK

1. Utvrđuje se Nacrt Odluke o obilježavanju javnih površina, institucija i ustanova imenima i zgrada brojevima na području Kantona Sarajevo i stavlja na javnu raspravu.
2. Javna rasprava održat će se u kantonalnim organima, jedinicama lokalne samouprave naučnim i stručnim ustanovama i trajat će 30 dana.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Komisiji za obilježavanje, čuvanje i njegovanje historijskih događaja i ličnosti Skupštine Kantona Sarajevo koja organizuje i provodi javnu raspravu.
4. Komisija za obilježavanje, čuvanje i njegovanje historijskih događaja i ličnosti Skupštine Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koja sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćena u pripremi Prijedloga Odluke o obilježavanju javnih površina, institucija i ustanova imenima i zgrada brojevima na području Kantona Sarajevo.

Broj: 01-_____19
Sarajevo, _____2019.

PREDSJEDAVAJUĆI
SKUPŠTINE KANTONA SARAJEVO

Elmedin Konaković

Na osnovu člana 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj _____, donijela je:

(NACRT)

ODLUKA
O OBILJEŽAVANJU JAVNIH POVRŠINA, INSTITUCIJA I USTANOVA IMENIMA I
ZGRADA BROJEVIMA NA PODRUČJU KANTONA SARAJEVO

I – OPĆE ODREDBE

Član 1.

Ovom odlukom utvrđuje se postupak i način određivanja imena javnih površina, institucija i ustanova čiji je osnivač Skupština Kantona Sarajevo (u daljem tekstu: javne površine, institucije i ustanove) i obilježavanje zgrada brojevima na području Kantona Sarajevo (u daljem tekstu: Kanton).

Član 2.

Javnom površinom u smislu ove odluke smatra se površina u općoj upotrebi unutar naselja na području Kantona Sarajevo, i to: aleja, avenija, brijeg, cesta, dol, gaj, kej, lug, most, obala, odvojak, ogranak, park, perivoj, poljana, prečica, prilaz, prolaz, put, stepenište, šetalište, šetnica, trg, ulica, vidikovac, vijenac, vrt, zavoj i drugo.

Član 3.

Komisija za obilježavanje, čuvanje i njegovanje historijskih događaja i ličnosti (u daljem tekstu: Komisija) podnosi Skupštini Kantona prijedloge iz člana 1. ove Odluke.

II – ODREĐIVANJE IMENA JAVNIH POVRŠINA, INSTITUCIJA I USTANOVA

Član 4.

- (1) Javne površine, institucije i ustanove obilježavaju se imenima, a zgrade brojevima
- (2) U naseljenim mjestima koja imaju više od 2000 stanovnika vrši se obilježavanje ulica, trgova i drugih javnih površina imenima i označavanje zgrada brojevima.
- (3) U naseljenim mjestima koja imaju manje od 2000 stanovnika vrši se samo označavanje zgrada brojevima.
- (4) Izuzetno od odredbi stava (3) ovog člana nazivi ulica, trgova i drugih javnih površina mogu se dodijeliti i u naseljenim mjestima manjim od 2000 stanovnika, ako tako

odluči nadležni organ jedinice lokalne samouprave, a shodno odredbama člana 10. ove Odluke.

Član 5.

- (1) Dvije ili više javnih površina na području Kantona ne mogu se obilježavati istim imenom.
- (2) Dvije ili više javnih institucija i ustanova čiji je Kanton osnivač ne mogu se obilježavati istim imenom.
- (3) Dvije ili više zgrada u istoj ulici, na istom trgu ili drugoj javnoj površini u naseljenom mjestu iz člana 4. stav (3) ove Odluke ne mogu se označiti istim brojem.

Član 6.

- (1) Ime javne površine, institucije i ustanove određuje se odlukom Skupštine Kantona, a na prijedlog Komisije.
- (2) Javne površine mogu se imenovati po geografskim pojmovima, toponimima, historijskim događajima i datumima, pokretima, organizacijama i ustanovama, po imenima historijskih ličnosti koje su obilježile kulturni, naučni, politički, društveni ili drugi oblik života Sarajeva, Bosne i Hercegovine i svijeta, po imenima drugih gradova i država te drugim odgovarajućim pojmovima.

III - FOND IMENA

Član 7.

- (1) Za područje Kantona Sarajevo vodi se jedinstveni Fond imena prema kojem se, u pravilu, određuju imena javnih površina, institucija i ustanova.
- (2) Fond imena osniva i njime raspolaže Komisija, po odluci Skupštine Kantona, a vodi ga Zavod za planiranje razvoja Kantona Sarajevo (u daljem tekstu Zavod).
- (3) Uputstvo o načinu vođenja i primjene Fonda imena donosi Skupština Kantona, na prijedlog Ministarstva prostornog uređenja, građenja i zaštite okoliša Kantona Sarajevo (u daljem tekstu nadležno kantonalno ministarstvo), a uz saglasnost Komisije.
- (4) Fond imena objavljuje se na internet stranici Zavoda.

Član 8.

- (1) Pisane prijedloge za uvrštavanje nekog naziva u Fond imena iz člana 7. ove odluke može podnijeti zastupnik u Skupštini Kantona, općina, mjesna zajednica, kulturna ili javna institucija, udruženje građana te sama Komisija.
- (2) Pisani prijedlozi iz stava (1) ovog člana moraju sadržavati sve bitne podatke o geografskim pojmovima, toponimima, historijskim događajima i datumima,

pokretima, organizacijama i ustanovama, ličnostima i drugim odgovarajućim pojmovima navedenim u članu 6. stav (2) ove odluke, uključujući i biografije ličnosti, historijske činjenice, društveni kontekst, etimologijsko značenje pojma i slično.

- (3) Na osnovu prijedloga iz stava (1). ovog člana Komisija može donijeti odluku da u Fond imena uvrsti pojmove, datume, odnosno imena ličnosti, za koje ocijeni da su valjano obrazloženi i argumentovani te za koje je dostavljeno dovoljno podataka na temelju kojih se mogu uvrstiti u Fond imena.

Član 9.

- (1) Odluku iz člana 8. stav (3) ove odluke Komisija može donijeti na osnovu ocjene kvaliteta i sadržaja predloženog rješenja.
- (2) Kvalitet predloženog rješenja, prilikom predlaganja imena ličnosti, očituje se u njenom liku i djelu, racionalnoj i savremenoj spoznaji tog djela te njegovog posrednog ili neposrednog utjecaja na prošlost, sadašnjost i budućnost građana Kantona Sarajevo, Bosne i Hercegovine i svjetske zajednice u cjelini, a Komisija će pri tom uzimati u obzir najviša javna i društvena priznanja koja su primile predložene ličnosti.
- (3) Sadržaj prijedloga se ocjenjuje u odnosu na ravnomjernu zastupljenost spolova, vrsta i oblika ljudskih djelatnosti, potrebu očuvanja bitnih odrednica demokratije, antifašizma i humanizma, bosanskohercegovačke i sarajevske tradicije, očuvanja sjećanja na imena i djela značajna za Sarajevo, bosanskohercegovačko društvo i svjetsku civilizaciju u cjelini.

IV - POSTUPAK I NAČELA IMENOVANJA JAVNIH POVRŠINA, INSTITUCIJA I USTANOVA

Član 10.

- (1) Inicijativa za utvrđivanje ili promjenu imena javne površine, institucije ili ustanove na području Kantona Sarajevo podnosi se putem Komisije za obilježavanje, čuvanje i njegovanje historijskih događaja i ličnosti.
- (2) Na temelju podataka iz Fonda imena Komisija utvrđuje prijedloge za imenovanje javnih površina.
- (3) Inicijativu iz stava (1) ovog člana za određivanje imena mogu u pisanoj formi podnijeti predlagači iz člana 8. stava (1) ove odluke.
- (4) Inicijativa iz stava (1) ovog člana mora da sadrži:
 - a) Obrazloženje o razlozima zbog kojih se predlaže davanje određenog imena javnoj površini, instituciji ili ustanovi;
 - b) Mišljenje nadležnih organa općine na čijem se teritoriju nalazi javna površina, institucija ili ustanova kojoj se određuje ili mijenja ime;

- c) Mišljenje relevantnog naučnog instituta, visokoškolske obrazovne ustanove ili stručnog udruženja u slučaju prijedloga imena historijskog događaja ili ličnosti.
- (5) Na zahtjev Komisije, podnositelj prijedloga dužan je dostaviti i dodatnu dokumentaciju.
- (6) Prijedlozi koji ne budu podneseni u skladu s odredbama ovoga člana neće se razmatrati.
- (7) Komisija je dužna u roku od sedam dana zatražiti mišljenje Zavoda.
- (8) Nakon pribavljanja pozitivnog mišljenja Zavoda, Komisija je u roku od sedam dana dužna dostaviti prijedlog imena nadležnom organu općine na čijem se teritoriju nalazi javna površina, institucija, ili ustanova koju je potrebno imenovati, koji je dužan proslijediti prijedlog savjetu mjesne zajednice na čijem se teritoriju nalazi javna površina, institucija, odnosno ustanova koju je potrebno imenovati (u daljem tekstu Savjet mjesne zajednice).
- (9) Savjet mjesne zajednice dužan je sprovesti javnu raspravu među stanovništvom nastanjenim u toj mjesnoj zajednici te dostaviti izvještaj o sprovedenoj javnoj raspravi Komisiji i nadležnom općinskom vijeću (u daljem tekstu Općinsko vijeće).
- (10) Ukoliko se imenuje javna površina koja je naseljena, Savjet mjesne zajednice dužan je sprovesti anketiranje građana nastanjenih na javnoj površini koja se imenuje, ili u njenoj neposrednoj blizini, te u neposrednoj blizini javne institucije ili ustanove koja se imenuje.
- (11) Potpise prikupljene anketom iz stava (10) ovog člana Savjet mjesne zajednice dužan je dostaviti Komisiji i Općinskom vijeću.
- (12) Općinsko vijeće dužno se očitovati u roku od 30 dana od dana kada mu Komisija dostavi prijedlog.
- (13) U slučaju da se Općinsko vijeće ne očituje u roku određenim stavom (3) ovog člana, smatra se da je Općinsko vijeće dalo pozitivno mišljenje na prijedlog.
- (14) Izuzetno odredbama stavova (3), (4), (5) i (6) ovog člana, ako se za javnu površinu predloži ime sadržano u Fondu imena, dovoljno je da predlagač naznači da je ime već uvršteno u Fond imena.

Član 11.

- (1) Kada se prema regulacionom planu naselja ili dijela naselja planira izgradnja nove javne površine, institucija ili ustanove Zavod je dužan u roku od 15 dana od dana stupanja na snagu odluke o usvajanju regulacionog plana o tome obavijestiti Komisiju.
- (2) Komisija je dužna da prije otpočinjanja realizacije regulacionog plana predloži određivanje imena nove javne površine, institucije ili ustanove, u skladu s odredbama člana 10. ove Odluke.

Član 12.

- (1) Pri utvrđivanju prijedloga Komisija se u svom radu vodi sljedećim načelima:
 - poštivanje izvornih imena javnih površina, kao i naziva koji su se udomaćili tokom proteklog vremena i postali dio svijesti stanovnika,
 - poštivanje načela rodne ravnopravnosti,
 - izbjegavanja nepotrebnog mijenjanja imena javne površine i
 - grupiranje imena javnih površina radi kvalitetne orijentacijske obavijesti

Član 13.

- (1) Nakon što se sprovede procedura, definisana odredbama člana 10. ove Odluke, Komisija utvrđuje prijedlog o imenovanju javne površine, institucije ili ustanove.
- (2) Na temelju utvrđenog prijedloga iz stava (1) ovog člana, Skupština Kantona donosi odluku o davanju imena javnoj površini, instituciji ili ustanovi.
- (3) Odluka iz stava (2) ovog člana objavljuje se u "Službenim novinama Kantona Sarajevo".

V - IZMJENE IMENA JAVNIH POVRŠINA, INSTITUCIJA I USTANOVA

Član 14.

- (1) Procedura izmjene imena javne površine, institucije ili ustanove jednaka je proceduri definisanoj odredbama člana 10. ove odluke.
- (2) Prijedlog izmjene imena neke javne površine, institucije ili ustanove, pored navedenog u članu 10. stav (4) ove odluke, mora sadržavati i obrazloženje razloga zbog kojeg se pokreće procedura izmjene imena.
- (3) Nakon što se sprovede procedura iz stava (1) ovog člana, Komisija utvrđuje prijedlog o izmjeni imena javne površine, institucije ili ustanove.
- (4) Na temelju utvrđenog prijedloga iz stava (2) ovog člana, Skupština Kantona donosi odluku o izmjeni imena javne površine, institucije ili ustanove.
- (5) Odluka iz stava (3) ovog člana objavljuje se u "Službenim novinama Kantona Sarajevo".

VI - OBILJEŽAVANJE IMENA JAVNIH POVRŠINA, INSTITUCIJA I USTANOVA

Član 15.

- (1) Ime javne površine, institucije ili ustanove obilježava se tablicom koja se postavlja na lako uočljivo mjesto, a koja ne mogu biti na visini nižoj od 2.5 metara.

- (2) Ime ulice obilježava se tablicama koje se postavljaju na zgrade na početku i na kraju ulice, s obje strane, kao i na svakoj raskrsnici ulice.
- (3) Izuzetno odredbama prethodnog stava, tablice s imenom ne moraju se postavljati na svakoj raskrsnici te ulice, ako je rastojanje između raskrsnica manje od 200 metara. U tom slučaju, tablice s imenom postavljaju se na početku i na kraju ulice te na svakoj drugoj raskrsnici te ulice.
- (4) Ime trga obilježava se tablicama koje se postavljaju na ulazu svake ulice na trg.

Član 16.

- (1) Tablice za obilježavanje imena javnih površina izrađuju se od trajnog materijala, tamno zelene boje i dimenzija su 50x30 centimetara.
- (2) Tablice za obilježavanje imena javnih institucija i ustanova izrađuju se od trajnog materijala zlatne boje.
- (3) Tekst imena na tablici iz stava (1) ovog člana ispisuje se velikim štampanim slovima bijele boje, a prema pravopisnim pravilima bosanskog jezika.
- (4) Tekst imena na tablici iz stava (2) ovog člana ispisuje se štampanim slovima crne boje, a prema pravopisnim pravilima bosanskog jezika.

VII - OBILJEŽAVANJE ZGRADA BROJEVIMA

Član 17.

- (1) Brojevi zgrada (kućni brojevi) označavaju se tablicama koje, pored broja, sadrže i ime ulice, odnosno trga, odnosno javne površine na kojoj se nalaze.
- (2) Kućni brojevi u naseljenim mjestima iz člana 4. stav (3) označavaju se tablicama koje, pored broja, sadrže i ime naseljenog mjesta.
- (3) Ime naseljenog mjesta ispisuje se štampanim slovima, prema pravopisnim pravilima bosanskog jezika, na dopunskoj tablici, koja se postavlja ispod tablice sa kućnim brojem.

Član 18.

- (1) Tablica sa kućnim brojem postavlja se na lako uočljivom mjestu, u pravilu iznad ili sa desne strane od ulaza u zgradu.
- (2) Ako zgrada ima više ulaza, svaki ulaz ima poseban kućni broj.
- (3) U slučaju da označavanje ulaza u neku zgradu posebnim kućnim brojem može dovesti do promjene kućnih brojeva na postojećim zgradama, ulazu tu zgradu označit će se istim kućnim brojem, uz dodavanjem slovne oznake uz broj.
- (4) Slovna oznaka uz kućni broj dodaje se po abecednom redu i čini sastavni dio kućnog broja.

- (5) Ako se zgrada nalazi izvan izgrađenog dijela naseljenog mjesta, tablica sa kućnim brojem mora sadržavati i naziv naseljenog mjesta.
- (6) Ako bi označavanje novoizgrađene zgrade posebnim kućnim brojem zahtijevalo promjenu kućnih brojeva na postojećim zgradama, novoizgrađena zgrada će se označiti brojem prve susjedne zgrade koja ima manji kućni broj, uz dodatak slovne oznake.

Član 19.

- (1) Vojni objekti i krugovi, bez obzira na broj ulaza u objekte i krugove i broj zgrada u krugovima, označavaju se samo jednim kućnim brojem.
- (2) Označavanje ostalih ulaza i zgrada u sklopu objekata i krugova iz stava (1) ovog člana vrši se prema propisima Armije BiH.

Član 20.

- (1) Označavanje zgrada brojevima vrši se u odnosu na smjer označavanja u glavnoj saobraćajnici.
- (2) U ulicama koje idu smjerom glavne saobraćajnice zgrade se označavaju smjerom označavanja u glavnoj saobraćajnici.
- (3) Označavanje zgrada u ulicama koje se granaju desno ili lijevo od glavne saobraćajnice započinje od strane na kojoj je glavna saobraćajnica.
- (4) U slijepim ulicama koje idu smjerom suprotnim od smjera označavanja zgrada brojevima u glavnoj saobraćajnici, označavanje zgrada brojevima vrši se s obje strane sa koje se dolazi u tu ulicu.
- (5) U naseljenom mjesto koje čini posebnu urbanističku cjelinu označavanje zgrada brojevima započinje sa one strane sa koje u naseljeno mjesto ulazi glavna saobraćajnica koja vodi u naseljeno mjesto iz pravca centra Grada Sarajeva, odnosno iz pravca centra općine kojoj naseljeno mjesto pripada, a označavanje zgrada u ostalim ulicama tog naseljenog mjesta vrši se u odnosu na glavnu saobraćajnicu, analogno označavanju zgrada u ulicama iz stavova (2) i (3) ovog člana.

Član 21.

- (1) Označavanje zgrada kućnim brojevima vrši se tako da zgrade sa lijeve strane ulice dobivaju neparne brojeve počev od broja 1, a zgrade s desne strane dobivaju parne brojeve počev od broja 2.
- (2) U ulicama, trgovima i drugim javnim površinama na kojima se zgrade nalaze samo s jedne strane, označavanje zgrada brojevima vrši se u neprekidnom nizu počev od broja 1.
- (3) Označavanje zgrada brojevima u naseljenim mjestima raštrkanog tipa i naseljenim mjestima iz člana 4. stav (3) ove Odluke vrši se redom koji je najpogodniji za najkraći

i najprirodniji prilaz od zgrade do zgrade.

Član 22.

- (1) Tablice za označavanje kućnog broja i dopunska tablica na kojoj se ispisuje ime naseljenog mjesta iz člana 4. stav (3) ove Odluke, izrađuje se od trajnog materijala tamnozeleno boje.
- (2) Tablica za označavanje kućnog broja je dimenzija 20x15, a dopunske tablice na kojoj se ispisuje ime naseljenog mjesta dimenzija 20x6 cm.
- (3) Kućni broj zgrade, slovna oznaka, kao i ime naseljenog mjesta ispisuju se štampanim slovima bijele boje.
- (4) Visina kućnog broja i slovne oznake jednaka je najmanje dvostrukoj visini slova kojima se na dopunskoj tablici ispisuje ime naseljenog mjesta.

Član 23.

- (1) Kućni broj određuje svojim aktom nadležni organ jedinice lokalne samouprave.
- (2) Akt iz stava (1) ovog člana dostavlja se Zavodu u roku od 10 dana od dana donošenja.

Član 24.

- (1) Na početku ulice, odnosno trga, odnosno druge javne površine može se pored tablice s imenom ulice, odnosno trga, odnosno druge javne površine postaviti i ploča sa podacima o historijskom događaju ili ličnosti po kojem ulica, odnosno trg, odnosno javna površina nosi ime.
- (2) Na zgradama javnih institucija, odnosno ustanova, čiji je osnivač Kanton, ispod table sa imenom institucije ili ustanove, može se postaviti i ploča sa podacima o historijskom događaju ili ličnosti po kojem institucija, odnosno ustanova, nosi ime.
- (3) Dopunska ploča iz prethodnih stavova ovog člana izrađena je od trajnog materijalima, zlatne boje.
- (4) Tekst na dopunskim pločama iz prethodnih stavova ovog člana ispisan je štampanim slovima crne boje, a prema pravopisnim pravilima bosanskog jezika.

VIII - OSTALE ODREDBE OBILJEŽAVANJA JAVNIH POVRŠINA, INSTITUCIJA I USTANOVA I OZNAČAVANJA ZGRADA BROJEVIMA

Član 25.

- (1) Obilježavanje imena javnih površina i naseljenih mjesta, označavanje zgrada kućnim brojevima, održavanje (popravke i zamjene) tablica s imenima i brojevima vrši nadležni organ jedinica lokalne samouprave za područje na kojem se nalazi javna površina, odnosno naseljeno mjesto.

- (2) Obilježavanje javnih institucija i ustanova čiji je osnivač Kanton te održavanje tablica s imenima i dopunskih tablica vrši nadležno kantonalno ministarstvo u saradnji sa Zavodom.
- (3) Troškove označavanja zgrada brojevima i održavanje tablica s kućnim brojevima snose vlasnici zgrada, odnosno korisnici zgrada, odnosno organizacije i zajednice kojima je povjereno tekuće i investiciono održavanje zgrada.

Član 26.

- (1) Vlasnici zgrada, organizacije i zajednice iz člana 25. stava (3) ove Odluke, kantonalni i drugi državni organi dužni su omogućiti nadležnom organu jedinice lokalne samouprave nesmeteno postavljanje tablica s imenima i kućnim brojevima.
- (2) Zabranjeno je neovlašteno postavljanje tablica s imenima javnih površina, institucija i ustanova te kućnih brojeva.

Član 27.

- (1) Investitor novoizgrađene zgrade dužan je najmanje 30 dana prije podnošenja zahtjeva za obavljanje tehničkog pregleda objekta podnijeti i zahtjev za označavanje zgrade kućnim brojem i uplatiti iznos potreban za označavanje zgrade kućnim brojem.

Član 28.

- (1) Vlasnik zgrade, odnosno organizacija i zajednica iz člana 25. stav (3) ove Odluke, kantonalni i drugi državni organi, koji se staraju o održavanju zgrada dužni su u roku od 15 dana od dana nestanka ili oštećenja tablice sa imenom ili kućnim brojem prijaviti nadležnom organu nestanak ili oštećenje tablice i uplatiti iznos potreban za postavljanje nove tablice.
- (2) Prijavu nestanka ili oštećenja tablice sa imenom ili kućnim brojem može podnijeti i komunalni inspektor kantonalnog, odnosno općinskog organa nadležnog za komunalne, odnosno inspekcijske poslove.
- (3) Nadležni općinski, odnosno kantonalni organ dužan je u roku od tri mjeseca od dana prijema prijave nestanka ili oštećenja tablice s imenom, odnosno kućnim brojem, postaviti novu tablicu, u slučaju nestanka ili kada se postojeća tablica ne može popraviti.

Član 29.

- (1) Ako se određuje ili mijenja ime ulice, trga ili druge javne površine, odnosno ako se određuje ili mijenja kućni broj, nadležni općinski organ dužan je u roku od tri mjeseca od dana određivanja imena ulice, trga ili druge javne površine, odnosno kućnog broja, zamijeniti tablice s imenom ulice, trga ili druge javne površine, odnosno kućnim brojem.
- (2) Ako se određuje ime institucije ili ustanove čiji je osnivač Kanton, nadležni kantonalni

organ dužan je u roku od tri mjeseca od dana određivanja imena institucije ili ustanove zamijeniti tablicu s imenom institucije ili ustanove.

- (3) Troškove promjene imena ulice, trga ili druge javne površine, osnovno kućnog broja snosi općina na čijem se području nalazi javna površina ili zgrada.
- (4) Troškove promjene imena javne institucije ili ustanove snosi osnivač.

Član 30.

- (1) Vlasnik zgrade, odnosno organizacija i zajednica iz člana 25. stav (3) ove odluke, kantonalni i drugi državni organi dužni su, prije nego što započne rušenje zgrade, o tome obavijestiti nadležni općinski organ te u obavijesti naznačiti kućni broj, ulicu ili trgi, odnosno naseljeno mjesto iz člana 4. stav (3) ove Odluke, u kojem se zgrada nalazi.

IX - REGISTAR JAVNIH POVRŠINA I ZGRADA

Član 31.

- (1) O javnim površinama i zgradama na području Kantona Sarajevo vodi se registar.
- (2) Registar javnih površina i zgrada vodi se u Zavodu za planiranje razvoja Kantona Sarajevo.
- (3) Pravilnik o uspostavljanju i načinu vođenja registra iz stava (2) ovog člana donosi nadležno kantonalno ministarstvo, uz saglasnost Vlade Kantona.

X- NADZOR

Član 32.

- (1) Nadzor nad provedbom odredaba ove Odluke vrši Kantonalna uprava za inspeksijske poslove Kantona Sarajevo, uz pomoć komunalnih inspektora.

XI - KAZNE NE ODREDBE

Član 33.

- (1) Novčanom kaznom u iznosu od 600,00 do 8.000,00 KM kaznit će se pravno lice koje:
 - a) onemogućava postavljanje tablice s imenom ili kućnim brojem (član 26. stav (1) Odluke)
 - b) neovlašteno postavlja tablice s imenom ili kućnim brojem (član 26. stav (2) Odluke)
 - c) nadležnom organu u određenom roku ne podnese zahtjev za označavanje nove zgrade kućnim brojem (član 27. Odluke)
 - d) u određenom roku ne prijavi nestanak ili oštećenje tablice s imenom ili kućnim

OBRAZLOŽENJE

I - PRAVNI OSNOV:

Pravni osnov za donošenje ove odluke sadržan je u članu 18. stav (1) tačka b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17).

II - RAZLOZI ZA DONOŠENJE:

Trenutno se imenovanje javnih površina, institucija i ustanova vrši prema Odluci iz 1994. godine - Odluka o obilježavanju ulica, trgova, parkova, mostova, institucija i ustanova imenima i zgrada brojevima na području Kantona Sarajevo ("Službene novine grada Sarajeva", broj: 7/94) te njenim Izmjenama i dopunama iz 2006. godine ("Službene novine Kantona Sarajevo, broj: 12/06).

S obzirom na to da je odluka donesena prije više od 20 godina, na raspolaganju je samo štampana verzija, koja je sada već doista nečitka, a i s obzirom na to da prečišćeni tekst nikada nije izrađen, otežano je praćenje njenih odredbi. Stoga je Komisija za obilježavanje, čuvanje i njegovanje historijskih događaja i ličnosti donijela zaključak da se pristupi izradi nove odluke koja će regulisati postupak i način određivanja imena javnih površina, institucija i ustanova čiji je osnivač Skupština Kantona Sarajevo.

Predlagač materijala:

**Komisija za obilježavanje, čuvanje i njegovanje historijskih događaja i ličnosti
Skupštine Kantona Sarajevo**

brojem (član 28. stav (1) Odluke)

e) pismeno ne obavijesti nadležni organ o rušenju zgrade, prije nego što rušenje započne (član 30. Odluke)

f) dostavi pismenu obavijest o rušenju zgrade u kojoj nije navedena oznaka ulice, odnosno trga, odnosno druge javne površine na kojoj se zgrada nalazi te oznaku kućnog broja (član 30. Odluke)

(2) Za prekršaj iz prethodnog stava ovog člana kaznit će se i odgovorno lice u pravnom licu novčanom kaznom u iznosu od 200,00 do 500,00 KM

(3) Za prekršaje iz stava (1) ovog člana kaznit će se građani novčanom kaznom u iznosu od 150,00 do 300,00 KM.

XII - PRIJELAZNE I ZAVRŠNE ODREDBE

Član 34.

(1) Stupanjem na snagu ove Odluke prestaje važiti Odluka o obilježavanju ulica, trgova, parkova, mostova, institucija i ustanova imenima i zgrada brojevima na području Kantona Sarajevo ("Službene novine grada Sarajeva", broj: 7/94 i "Službene novine Kantona Sarajevo, broj: 12/06).

Član 35.

(1) Ova Odluka odnosi se samo na one javne površine, institucije i ustanove koje će se imenovati nakon njenog stupanja na snagu. Neće se primjenjivati na već imenovane javne površine, institucije i ustanove.

Član 36.

(1) Ova odluka stupa na snagu osmog dana od dana objavljivanja u "Službenim novinama Kantona Sarajevo".

**Predsjedavajući
Skupštine Kantona Sarajevo
Elmedin Konaković**